


李長卿集

二十三卷

淨明經傳正訛上

二十四卷

淨明經傳正訛下



李長卿集卷之二十三

豫章李鼎著

門人同邑汪應婁校

淨明忠孝全傳正訛

上

淨明忠孝全傳正訛序

按都仙八十五化書始金烏夢徵終游幃鼎建晉唐間有關淨明忠孝道法者記載頗爲詳悉不知作者姓名而好事者托之施太玉真人之筆予讀之竊有疑焉洞真唐人也旣稱太玉冲舉與真君

長卿集卷二十三
同在寧康二年胡得預及唐事一可疑也晉人詩
文風骨齊梁已爲後塵何至作宋元間委巷歌謠
二可疑也旣稱都仙夢感道君在政和六年始有
封典何十一真人之封前此而見三可疑也蓋作
者欲彰神聖之奇而反以傷誕欲著巔末之詳而
反以傷冗欲侈雅俗之觀而反以傷俚卽深信如
洪州人士且有疑焉而欲令疑者之信不已遠乎
頃八百之期近在目睫將五陵之雲合而至者文
獻無徵則地主之責胡可逭焉緣取全書稍加刪

潤質以道藏之所紀錄父老之所傳誦彙爲一帙
題曰淨明忠孝全傳正訛而序諸簡端曰赫赫都
仙遡源軒曆惟淨惟明忠孝示則玄聖素王塗殊
歸一摧虺殲蛟奠我南國御風上昇光叅日月作
道師旌陽許真君傳第一曲阜蘭興黃堂謹擬有
開必先玉璞金鑛作啟教蘭公謹姆傳第二許君
崛起羣真響臻神凝精聚京觀氛稜金火旣熟聳
身入雲翱翔天路香案侍宸作傳教十一真人傳
第三紫芝燁燁首陽之巔吉兆有托脫屣稱賢雙

長庚集卷之三十一 淨明
峰擢秀書記翩翩執鞭仙吏所欣慕焉作際真金
胡詹許傳第四爰作之師俾助上帝玉檢琅函金
符石匱監茲下民擇可而畀作經法監度三師傅
第五龍沙協讖卯金忽興烏晶表瑞壇靖經營妙
契儒術闡發淨明于今八百先覺是程作揚教劉
玉真先生傳第六厥有中黃玄宗法器開徐啟趙
長春挾秘四朝褒嘉祐啟勿替作嗣教四先生傳
第七大都黜誕守經而務闕疑似裁冗就簡而事
戒妄增去俚還雅而誼存通俗差足爲淨明之信

史也已至如都仙之遺論玉真之語錄中黃之問
答當載之別乘曰淨明忠孝全書別編則有待於
異日云

太上靈寶淨明中黃八柱經

中言其正黃言其色六合之外亦有六合乾坤之
內豈無乾坤一身之中肝爲青華之都心爲赤明
之府肺爲素輝之宇腎爲黑玄之郡脾位乎中名
曰黃庭有真人焉衣金縷坐金蓮名蕊珠字瓊仙
守其宮識其面者故能入於玄玄與天齊年正中

黃者必虛四谷塞二兌開二洞立八柱四谷者眼
爲神光之谷耳爲和聲之谷口爲靈泉之谷鼻爲
眞香之谷眼無非視則神光熒熒耳無非聽則和
聲殷殷口無妄食則靈泉清鼻無妄臭則眞香發
二兌者前兌泄精後兌泄氣精出於思氣出於食
少思則眞精內固少食則眞氣內全二兌塞中田
固矣二洞者頂爲乾靈之洞炁所出入者也上腭
爲玉神之洞液所出入者也四谷虛而外邪不侵
二兌塞而內正不泄舉炁上升則慶雲集於乾靈

之洞可以飛神玉京取液漱咽則醴泉出於玉神
之洞可以灌溉金鼎八柱者神舍之主也又爲垂
世八寶忠則不欺孝則不悖廉則罔貪謹則無失
修身如此可以成德寬則得衆裕則有餘容則翕
受忍則安舒以此接物怨咎滌除中黃本非意立
惟渾含斯識中黃矣八柱本非精思惟中黃斯有
八柱矣

序曰世傳都仙論著凡十餘種焚香整襟讀之
輒若端冕而聽古樂惟恐臥也玉眞子曰石函

金瑣諸書皆非真君所作式獲我心矣間取中
黃八柱經擇其粹者識以丹鉛復以垂世八寶
一章補八柱之闕爰走副墨錄之小箋得三百
八十一言朗誦百過若汰沙磧而收金屑徹瓦
缶而奏雲門都仙垂聽九天當亦首肯昔陰符
三百言道德八十一章茲經詞約義深足叅二
經之間而數亦與之相準亦神奇矣哉

疏曰道無位而曰中者無位之位也道無色而
曰黃者無色之色也六合之外有六合者大莫
載也乾坤之內有乾坤者小莫破也天地相去
八萬四千里其間有中黃焉是積陰生陽積陽
生陰之會也人身心腎相去八寸四分其間有
中黃焉是積液生炁積炁生液之會也肝屬東
方之木其色青而魂藏焉心屬南方之火其色
赤而神藏焉肺屬西方之金其色白而魄藏焉
腎屬北方之水其色黑而精藏焉脾屬中央之
土其色黃而意藏焉經曰黃庭內人服錦衣者
真人也老子所謂谷神不死又謂天地之間又

謂不如守中皆指此耳守之之法總不出乎綿綿若存之一語存於有意無意之間而五炁會於中宮矣

疏曰五色亂目使目不明五聲亂耳使耳不聰五臭薰鼻困憊中顛五味濁口使口厲爽趣舍滑心使性飛揚此南華老人之言也含眼光凝耳韻調鼻息減舌氣是爲和合四象眼不視而魂在肝耳不聞而精在腎舌不味而神在心鼻不香而魄在肺四肢不動而意在脾是爲五氣

朝元此紫陽真人之言也皆足發明四谷之義疏曰元精元炁總會於中黃一宮蓋脾者思所從出而食所由運者也思道之外無邪思是爲少思食炁之外無雜食是爲少食二兌之源塞矣然不可不塞其流焉前兌塞則任脉起毛際由腹裏達承漿而上與督交後兌塞則督脉起下極循夾脊上昇泥丸落人中而下與任交孔子贊易而曰逆數斯深於二兌之旨矣疏曰炁者積液之所生也降於上腭則爲玉神

之洞玉京者上帝之高居也金鼎者真人之玄
房也四谷虛矣二兌塞矣故呼吸之炁化爲元
炁是爲三華聚頂而象之曰慶雲交感之精化
爲元精是爲華池神水而象之曰甘露慶雲生
則煉氣化神而嘿朝上帝甘露降則五芽滋長
而溫養真人

疏曰仲尼氏訓忠孝討亂賊憂世之志切矣老
氏乃曰六親不和有孝慈國家昏亂有忠臣又
若有不屑焉者晉人課虛無廢名檢至與禮法

之士相視若仇寧獨將無同而已耶都仙起晉
代崇道德惓惓以忠孝爲教又自忠孝而衍爲
八柱玄聖素王之統一矣玉真子申言之曰忠
者一物不欺孝者一體皆愛又曰比干極諫殺
身謂之忠大舜終身而慕謂之孝善卷不受堯
讓謂之廉南容三復白圭謂之慎榮啟期居常
待終謂之寬黃叔度汪洋千頃謂之容張公藝
九世同居謂之忍其爲八百之師也宜哉
疏曰合而言之中黃者神炁之根虛無之竅無

邊傍無內外守以無心則火冷守以有心則火燥故曰惟渾含斯識中黃矣八柱者持身之本應務之源無定形無定所舍一而逐八則紛執一而廢八則固故曰惟中黃斯有八柱矣

淨明道師旌陽許真君傳

真君姓許名遜字敬之潁陽由之後也世爲許昌人曾祖琰祖玉父肅高節不仕漢末避地於豫章之南昌因家焉吳赤烏二年己未母氏夢金鳳啣珠墜於掌中翫而吞之因是有娠而生真君焉姿

容秀偉穎拔通疎嘗從獵射一鹿鹿中之子墮鹿猶顧舐之未竟而斃因感悟卽折棄弓矢尅意爲學博通經史明天文地理音律五行讖緯諸書尤嗜神仙修煉之術聞西安吳猛得至人可義神方乃往師之悉傳其秘遂與郭璞訪名山求善地爲棲真之所得逍遙山金氏宅遂徙居之日以修煉爲事德義孝友化行一鄉嘗有售鐵燈檠者細視之金也訪而還之郡舉孝廉不就大康元年起爲蜀郡旌陽縣令時年四十二視事之初誠吏胥去

長卿集卷二十三 清明上
貪鄙除煩細脫囚繫開諭以道吏民悅服自新先是歲饑民流移載道真君乃以神丹點瓦礫爲金潛瘞縣圃籍民之逋負者使服役焉民多獲金輸納歲又大疫死者十而七八真君符呪所及應時而愈他郡扶病至者日以千計於是標竹郭外十里江上置符其中凡就竹下飲者汲歸飲者無不立愈真君知晉室將亂棄官東歸民爲立祠繪像事之羸糧集送不遠千里有追隨至家服役不返者乃於宅東隙地結茅以居狀如營壘故號許家

管焉真君嘗至新吳憇於栢林有女童五人各持寶劍以獻真君識其劍仙也禮而受之故獲神劍之用今奉新栢林觀是也石上劍跡三井存焉又

與吳君之丹陽縣黃堂靖問道於譙姆姆以所受孝道明王之法併蘭公所付孝悌王銅符鐵券金丹寶經授之且謂吳君曰君昔以神方爲許君之師今孝道明王之道獨許君得傳君當返師之二君辭謝方心期每歲必來謁姆姆覺之曰子勿來吾卽返帝鄉矣因取香茅一株南望擲之曰子歸

於茆落處立吾祠歲秋一至足矣二君既還於舍南四十里得茅已叢生矣遂建祠亦以黃堂名之厥後復遇日月帝君授以淨明靈寶忠孝之道真君嘗過黃堂見民烹宰祀神相詫曰祭不腆則神怒而降之罰矣真君曰惟崇敢爾夜宿逆旅召風雷伐之居民取汲頗遙真君舉杖刺社前澗澤泉立湧出雖旱不竭渡蜀江時逆旅主人朱姓者接待甚恭真君戲畫一松于壁而去其家利市加倍後江漲市舍俱漂唯松壁不壞今名松湖市朱氏

廟食其地

真君嘗煉神丹於艾城之黃龍山有蛟魅輒作洪水欲漂丹室真君遣神兵擒之釘于石壁丹成祭於幕阜葛仙石室然後服之至修川愛其湍急味堅遂磨神劍於澗傍石上過西安縣今

寧州

社伯出謁真君詰其地有妖否社伯匿不以

聞一小廟之神迎告曰此有蛟孽知仙君來暫避鄂渚真君躡跡追至橋側勅吏兵追之爰錮社伯祠門而移其祀以祀小廟今寧州城隍廟常閉開

有火災小廟神今封協祐侯

真君聞新吳有蛟爲

長卿集卷二十三
孽因往捕之

所經處曰龍泉觀今改儒遊

蛟懼入

溪穴

今號藏溪

乃以巨石書符作鎮蛟文以禁之

鎮蛟石存建觀曰延真在奉新縣西四十里

海昏

上遊有巨蛇據山爲穴吐氣成雲亘四十里人物
在其氣中者卽被吞吸江湖舟船遭覆溺者無筭
真君集弟子將往誅之居民兢來懇告真君曰世
運周流當斯厄會吾此來當爲汝曹除之誓不與
此孽俱生也卓劍默禱良久飛泉湧出有赤烏飛
過

赤烏蓋許君稟太陽餘氣而生世傳金鳳啣珠

誤也其地建赤烏觀後改壽聖又曰廣福

遂前至

蛇所蛇懼入穴乃飛符召海昏社伯驅之不能出

復召南昌社伯助之

符落縣東因建觀名太和蛇

舉首高十餘丈目若秉炬毒霧冲天乃嘯命風雷
指呼兵吏吳君飛步躡其首揮劍劈之弟子施岑
其戰輩引劍裂其腹有小蛇自腹奔出長數丈行
六七里聞鼓譟聲猶返顧其母弟子請追戮之真
君曰彼無罪也五百年後若爲民害吾當復出誅
之以壇前栢枝拂地爲記焉又曰吾仙去後一千

二百四十年間五陵之內當出弟子八百人其師
 出於豫章大揚吾教郡江心忽生沙洲掩過沙井
 口者是其時也若此時小蛇為害彼八百人自當
 誅之苟無害於物亦不可誅也蛇子遂入江大蛇
 既死其骨聚而成洲今名蛇骨洲真君於海昏經
 行之處立七靖鎮之時晉懷帝永嘉六年壬申歲
 也真君道術高妙求為弟子者數百人却之不可
 乃化炭為美婦人以試之今名炭婦港其不為所
 染汚者惟十人耳凡周遊江湖無不從焉即異時

上昇之高弟也真君歸郡周覽城邑有一年少美
 風度衣冠甚偉通謁自稱姓慎禮貌勤恪應對敏
 給遽告去真君謂弟子曰適者非人老蛟之精來
 見試也禮貌雖是腥風襲人吾故愚之庶盡得其
 醜類耳迹其所之乃化為黃牛臥於沙磧之上今

名黃牛洲真君乃剪紙化黑牛往闔之令施岑持

劍俟其闔酣即揮之中其股牛奔入城南井中井
名黃泉在上藍寺東南墻角邊是也故亦號蛟井

真君遣符吏尋蹤乃直至長沙賈誼井中出化為

人卽入賈玉使君之家先是蛟精慕玉女美色化爲一少年謁之玉愛其才以女妻之居數歲生子常以春夏之交予然而出至秋則重載寶而歸蓋覆舟所獲也是秋徒還給玉曰爲盜所劫且傷左股真君託爲醫術謁玉至其堂叱曰江湖蛟孽害物非一吾尋蹤至此豈容逃遁蛟計窮乃見本形爲吏兵所誅二子皆化爲小蛟併誅之賈女亦幾變形真君給以符故得不變真君謂玉曰蛟精所居其下卽水可速徙居從之其地果陷爲潭深

不可測真君復還豫章蛟餘黨心不自安化形爲人訪真君弟子曰聞賢師有神劔願聞其功弟子曰吾師神劔指天天裂指地地拆指星辰則失度指江河則逆流萬邪不敢當神聖之寶也曰亦有不能傷者乎弟子戲之曰惟不能傷東瓜葫蘆耳蛟以爲誠然盡化其屬爲東瓜葫蘆浮泛滿江擬流出境乃使施岑履水斬之真君曰此地蛟螭所穴不以鎮之後且爲患乃役鬼神於城南并鑄鐵爲柱下施八索鉤鎖地脉由是水妖屏跡城邑無

虞復爲記曰鐵柱鎮洪州萬年永不休八索鉤地脉一泓通江流天下大亂此地無憂天下大旱此地薄收地勝人心善應不出奸謀縱有奸謀者終湏不到頭

今鐵柱宮井水消長與江河水等

岌嶷

山頂有蛟湖三所其孔穴透大江通饒信真君誅蛟後立玉陽靖以鎮之又鑄鐵柱鎮鄱陽湖口絕蛟魅出入之路明帝大寧二年將軍王敦舉兵內向次於湖真君與吳君往謁冀說止之時郭璞先在幕府因璞見之敦延飲問曰予夢一木破天君

等以爲如何吳君曰木上破天乃未字也公其未可妄動敦色變令璞筮之璞曰無成敦曰予壽幾何璞曰公若舉事禍將不久敦怒曰君壽幾何璞曰壽盡今日日中敦大怒令武士擒璞斬之真君舉杯擲起化爲白鶴飛繞梁間敦舉目已失二君敦竟敗二君至金陵召龍挾舟從廬山紫霄峯金闕洞還至天寶洞遂歸舊隱至孝武帝康寧二年甲戌八月朔旦有雲仗自天而下一仙降庭宣玉皇詔旨授真君九州都仙太史兼高明大使真君

再拜登受一仙曰余乃玉真上公崔子文一仙曰
余乃元真上卿瑕丘仲告真君以沖舉之期遂去
真君悉召弟子與鄉曲耆老設宴敘別是月望日
大營齋會少長畢至日中遙聞音樂之聲祥雲四
布羽蓋龍車從官兵衛仙童綵女前後導從二詔
使又至揖真君昇龍駕陳勳時荷持策前導周廣
曾亨驂御黃仁覽與其父族侍從盱烈與其母部
從仙眷四十二口同時昇舉雞犬亦隨逐飛騰留
脩行鍾一石函一爲記有僕許大者與其妻市米

于西嶺聞真君飛昇奔歸車覆遺米於地皆復生

今有翻車崗生米河存

比至泣求從行真君授以

地仙之術夫婦皆隱西山仙仗旣舉有頃墜下藥
臼車轂雞籠各一并數鼠墮地雖拖腸而不死意
其嘗竊食丹藥也後人見之必爲瑞應焉初真君
回自旌陽奉蜀錦於謚姆制爲殿帷至是忽飛來
旋繞於故宅之上復入雲霄真君生於吳大帝赤
烏二年己未正月二十八日住世一百三十六年
有淨明秘法大功如意丹方傳于世卽丁義方中

之一也在天則判雷霆泰省淨明學者尊之曰道師君

李鼎曰都仙鳳翥於晉朝而十一真蒸蒸方駕玉真雀起於元季而四先生英英代興至德不孤寧獨顏得孔而益彰哉黃徐趙猶去勝國而長春子近沐四廟休光往往爲父老之所睹記且斬邪飛步之術諸弟子轉相傳授當亦不減充棟然而有驗有不驗者則以靈府淨穢明暗之殊軌耳大真人者一洗而還之太空於殲此

么膺之遺孽也何有

淨明道師旌陽許真君後傳

真君飛昇後里人與真君族孫簡就其地立祠至唐高宗永淳中天師胡惠超重興建之明皇尤加寅奉宋真宗遣中使齎香帛改賜額曰玉隆

取度

人經大釋玉隆騰勝天之義

置官提舉政和六年

徽宗晝夢一道士頂九華冠披絳章左右執劔紉捧印杖直至殿上長揖曰予許旌陽也權掌九天司職上帝詔往按察西瞿耶國經由故國見妖氣

甚盛故相謁耳帝曰其患爲何曰湖南北三十六萬絹綱皆已墮水此實小蛇爲害蓋先朝悞封此孽爲王故耳俟吾竣事當有處分不令住於江淮間矣帝復問曰朕患安息瘡諸藥不能奏效真君得無意乎卽授藥一丸其大如黍持呪抹於患處頓覺如清涼入骨遂揖而去不數武復回顧曰吾故舍敝矣望畱意焉帝瞿然而覺不數日有司果奏絹綱被風漂溺悉與夢合爰取圖經考之見洪州分寧縣梅山有許氏旌陽磨劒故地詔刻夢中

所見之像祀之賜額上清儲祥宮不數月復夢真君詣上前稱謝且曰分寧乃昔經地耳吾故宅尚在西山復詔洪州改修玉隆萬壽宮壯麗殊極建炎中金人寇江左欲火宮庭俄而水自楹間溢出火不能焚虜酋大驚戢兵而去唐州牧巖誤見鐵柱心頗不信嘗令發掘俄有迅雷烈風江波泛溢城郭震動誤懼叩首悔謝久之而止誤又徙修行鍾置之僧寺擊之無聲坐而假寐神人形見怒責立送還宮一夕飛去莫知所之石函雖有窾縫而

不可開唐張善安據洪州時命鑿開之內有丹書
曰狂賊張善安開此善安懼而磨洗終不能滅真
君之像凡六惟祀前殿寢殿者不動餘小像任鄉
民迎請季夏六旬之間周遍洪瑞接境八十一鄉
同詣宮醮謝曰黃中齋

黃中儀式真君所流傳也

七月二十八日仙駕登宮左之五龍崗禁辟蛇虎
謂之禁壇仲秋號淨月自朔至晦洞開宮門受四
方禮謁禱賽百貨畢集是月望日修慶賀上昇齋
先一日為始次日黃紫庭來觀黃蓋真君壻也每

三歲上元後一日真君仙仗詣瑞陽黃宅報謝居
民迎送悉有常規或以天之陰晴行之疾速卜歲
豐歉焉導從結束與今殊異蓋晉代之禮也

唐道

士熊景休詩曰世事已歸唐歷數仙歌猶是晉鄉
人在唐時已駭觀矣

李鼎曰沖舉之事傳神仙者往往而書正史不
載意深遠矣鐵柱維鎮地脉則自旌陽公特創
為有目者所共睹焉可誣也蓋宇宙在手萬化
生身造無而有則為鐵柱化有而無則為拔宅

玉真子以爲役神物移置海島則物而不化矣
總之以淨明忠孝爲本何必異於聖學哉列子
曰仲尼能爲而能不爲者也可以釋千古之疑
網矣

淨明啓教蘭公諶母傳

蘭公姓蘭名期莫敢呼其名第稱曰蘭公居兗州
曲阜縣高平鄉精修孝行致斗中真人下降其家
自稱孝悌王諱弘康字伯中語蘭公曰始炁爲大
道於日中爲孝道仙王元炁爲至道於月中爲孝

道明王玄炁爲孝道於斗中爲孝道悌王夫孝重
於天日月爲之明孝至於地萬物爲之生孝至於
民王道爲之成予降自上清託化人間示陳孝悌
之教後晉代當有真仙許遜傳予孝道之宗是爲
衆仙之長因付蘭公秘旨及金丹寶經銅符鐵券
令傳授丹陽黃堂女真諶姆且戒之曰將來遜至
當以此授之孝悌王將蘭公遊於郊野道傍見三
古塚指示蘭曰此汝三生解化之迹第一塚藏爾
昔時屍解所遺仙衣第二塚乃爾太陰鍊形形體

已就今當起矣第三塚藏爾蛻骨今宜移塚傍之路勿令人物踐履之言訖仰天昇化蘭公乃榜示行人勿由舊路人或訟之縣吏吏詰其故公具以實對吏不之信遂開三塚一塚果貯黃衣一襲一塚果有人童顏弱質如睡之初覺一塚貯連環骨一具衆咸驚歎吏持仙衣還獻府君府君着不能勝還與蘭公公服之卽同塚中仙人合爲一體竦身輕舉官吏悔謝虔懇拜問何時再降人間公語之曰自茲或十日或百日一降施行孝道以濟迷

途其後吳都有童子出見是真仙之化身也將弘孝道之教以接合仙之士焉

諶姆者嬰姆也姓諶字曰嬰不知何許人也嘗居丹陽郡之黃堂潛修至道忘其甲子耆老自童時見之鬢髮髻容久而無改衆稱爲嬰姆因入吳市見一童子年可十四五叩首再拜曰合爲姆兒姆未之許太息而去月餘復過吳市逢一童子年僅三歲執母衣裾悲號不捨姆不獲已收而撫之旣長聰慧孝敬迥出常人所居常有異雲覆之侍母

左右時說蓬壺閬風之事母曰吾汝暫此相因汝
將以何爲姓童子曰昔蒙天真授以靈章名爲孝
道明王今宜稱而呼之矣遂告母修真之訣曰母
須高處玄臺踈絕異黨脩間立阜餌服陽和靜夷
玄圃委鑒大虛若非無英寶帙黃老玉書大洞真
經豁落七元大上隱玄之道不可偃息一作輕蓋
於流霞之輦眷眄乎文昌之臺得此道者九鳳齊
唱天籟駭虛一作萬靈萃止竦身御節入景浮空
龍輿虎旂遊扇一作遊翔八方矣母宜寶之一旦

孝道明王漠然隱去母密修大法積數十年人莫
知也其後吳許二君聞姆有道遠詣丹陽求授道
法姆乃授許君以孝道明王之法且曰猛昔爲遜
師今玉皇玄譜之中猛爲御史遜爲高明大使又
遜領玄枵之野於辰爲子猛統星紀之邦於辰爲
丑令吳以師禮事許轉相傳授又數年有雲龍之
駕千乘萬騎來迎謹母白日升天今洪州萬安縣
東四十里有黃堂壇靖卽許君立祠祀聖母之所
每年八月三日鄉民必恭迎仙駕詣黃堂謁謹姆

云

淨明傳教十一真人傳

吳猛字世雲濮陽人仕吳為西安令因家焉性至孝齟齬時夏月手不驅蚊懼其去已而噬親也年四十得至人丁義神方廣列仙傳曰丁義瑞州人以神方授吳真君女秀英亦成仙今瑞州崇元觀有秀英煉丹之所其丹井今猶存焉繼師南海太

守鮑靚復得秘法

晉書云鮑靚字太玄東海人年五歲語父母曰本是曲陽李家兒九歲墮井死其

父母尋訪得李氏推問皆符驗靚學兼內外明天河洛書後見仙人陰君授道訣百餘歲卒吳黃龍

中天降白雲符授之遂以道術大行於吳晉之間

晉武帝時許真君從世雲傳法世雲盡以秘要授

之永嘉末杜弢寇蜀攻陷州縣真君既誅大蛇世

雲曰蛇是蜀精蛇死則杜弢滅矣卒如其言嘗見

暴風大發書符擲室上有青鳥啣去風即隨止或

問其故荅曰南湖有舟遇此風中有二道士呼天

求救故以此止之驗之果然西安令干慶死已三

日世雲曰令長數未盡當為訟之于天遂臥于屍
傍數日與干慶俱起慶弟著作郎寶感其異遂作
搜神記行于世嘗渡豫章江值風濤乏舟世雲以
所執白羽扇畫水而渡觀者駭異寧康二年真君
上昇世雲復還西安是年十月十五日上帝命真
人周廣捧詔召世雲遂乘白鹿車與弟子四人白
晝冲昇宅號紫雲

今分寧縣吳山村西平靖吳仙

觀是也宋徽宗政和間封神烈真人

陳勳字孝舉蜀川世族儒生博學洽聞少時已有

出塵之志入青城山師谷元子求度世之法繼聞
真君在旌陽仁政翔洽走謁公庭願補書記真君
嘉之付以吏職表率輩流化俗撫字裨益為多遂
引為弟子託以腹心典司經籍守視藥鑪真君冲
翥令執策導前焉玉隆宮西廡有孝舉道院號承
仙府手植巨栢一株當道院前宋徽宗政和間封
正特真人

周廣字惠常廬陵人大將軍瑜之後少好天文音
律之學長通無為清淨之教嘗與同志遊蜀雲臺

山得漢天師驅剪精邪之法救民疾苦聞真君在
旌陽遂詣公庭願備下走真君納之令供侍杖屨
夙夜惟勤遵行道法始終不怠還居私第左右無
違乃就宅西百餘步間築室以居真君飛舉惠常
與魯興國同驂龍車宅號宣詔府

唐保大中州牧

周令公紹真人爲祖修營其宅改曰宣詔府有碑
刻尚存今日曰大虛觀宋徽宗政和間封元通真人

曾亨字興國泗水人參之後也少爲道士明敏博
學修三天法師之教名山列嶽有路必通秘檢靈

符隨治立愈孫登見而異之曰子骨秀神清必作
霄外人矣後隱居豫章之豐城聞真君道譽遐暘
投謁門下願侍巾几真君雅器重之多傳異術後
驂龍車昇天

今豐城縣真陽觀是其遺迹

政和間

封神惠真人

時荷字道陽鉅鹿人爲黃冠上士少修道德之教
入四明山遇神人教以胎息衆妙之術用能却寐
絕粒役鬼驅邪點化金玉調濟窮苦惠懷之世聞
真君道法盛行江左徒步踵門願充弟子真君納

之授以仙訣復遣還山教授徒衆明帝詔赴闕庭
待以師禮堅意求歸依侍真君康寧二年與陳孝
舉執策導從昇天有遺跡在豫章城號紫蓋府
南昌縣廳是也東海沐陽縣奉仙觀乃其舊隱宋
徽宗政和間封洪施真人

甘戰字伯武豐城布衣以孝行見推於鄉黨因亂
晦迹草澤慕神仙久視之術聞真君行孝悌大法
除害利物造門願備驅役真君異其材器可其所
請及上昇時復付以金丹秘訣後歸豐城布德行

惠至陳宣帝大建元年正月七日亭午駕麟車乘
雲而去
今縣中清都觀乃昔藏丹之地其故宅號

華陽亭有飛簣觀政和間封精行真人

施岑字太玉沛郡鄉閭壯士祖朔仕吳因從居九

江赤烏縣太玉狀貌雄傑勇健多力弓劍絕倫真

君初率徒衆誅海昏巨蛇會壯士三百餘人助力

太玉與焉恭懇充役真君納之與甘伯武常執劍

侍左右寧康二年十一月二十八日晨起見東方

日中有一童子乘彩雲執素策驅蒼虬降其所居

宣玉帝詔遂御蒼虬乘雲而去真君宅東南二里許有壇曰紫玉府卽其所棲之地江中石上有觀曰至德爲太玉眺臺所以眺望水妖也宋徽宗政和間封勇悟真人

彭抗字武陽蘭陵人舉孝廉仕晉累遷尚書左丞密修仙業引疾歸事真君納愛息女爲真君子婦舊以彭女爲夫人非也故老稱爲子婦是矣真君懷帝永嘉末化炭婦誅蛇而彭君在許其年已七十六七矣豈復親之乎亦屢聞真君夫人周氏

著孝道讚有周女史荅肝母問一篇疑夫人謙稱

故曰女史真君嘉其恪誠授以秘要促之還朝至

穆帝永和二年致政南遊挈家居豫章城中再詣

門下朝夕扣問道業精進宋高祖永初二年職方

乘作義熙二年八月二十四日舉家二十六口白

日昇天郡城有宗華觀宋徽宗政和間封潛惠真

人

盱烈字道微南昌人少孤事母以孝聞母蓋真君之姊也真君有姊二盱母爲長遺愛錄云南昌盱

長即表卷三十三爭月上

君烈鍾離君嘉皆許君之甥則盱母爲真君姊信

矣

真君念其孀居乃築室於宅西數十步間俾居

之故母子日聞道妙真君每出則盱母代掌家事

仙賓隱客咸獲見之

胡天師石竈詞曰吾昔嘗到

此則客於盱母

母子並受玉皇詔部分仙眷昇天

今墻西道院乃其舊居號合儀府宋徽宗政和間

封和靜真人

鍾離嘉字公陽南昌人真君仲姊之子少喪父母

植性簡淡真君稱其夙有道資授以神方妙訣並

能拯災逐疫真君登昇首以金丹賜之是年十月

十五日日中碧霞寶車自天來迎公陽拜詔昇車

而去新建象牙山西源是其所也有觀曰丹陵石

藥臼尚存號鍾玉府宋徽宗政和間封普惠真人

黃仁覽字紫庭建城人父輔字萬石舉孝廉仕至

御史紫庭神彩英秀局量凝遠真君以子妻之盡

傳大道任青州從事單騎之官留妻侍父母然每

夜輒歸人莫知也一夕姑聞許氏院中夜有語笑

聲詰旦訊之許曰黃郎爾姑曰吾子從事數千里

安得至此許曰彼已得仙道能頃刻千里戒母漏語故不敢令姑知姑曰若然胡可不使我一見乎是夕紫庭歸許氏告以故比明紫庭不獲已出謁父母曰仁覽雖從宦遠遊夜必潛歸膝下仙道秘密不可泄言恐招譴累言訖取竹杖化爲青龍乘之而去紫庭弟二人勇健不檢日事遊畋自言受性縱逸不堪作仙紫庭折草化鹿以止之二弟後隱于西山今方崗廟俗呼黃四郎五郎是也瑞州高安縣祥符觀舊曰祈仙觀是其故居旁有許氏

陸士釵洲

父輔亦嘗求爲真君弟子以其懿戚待以客禮故不與十一人之數諸弟子受法各立府亭之名大儀曰府小儀曰亭乃行道法以人數多少名之宋徽宗政和間封冲道真人

李長卿集卷之二十三

文公曰... 中道真入

大辨曰... 不與十一人之... 文辭亦嘗未... 立於世

李長卿集卷之二十四

豫章李鼎著

門人泰和郭孔陵校

淨明忠孝全傳正訛

淨明際真金胡詹許傳

金公 或云名寶行七 世居豫章西山輸粟進民爵

朴直公正鄉閭推服真君與郭君遙望地脉徑造其所郭君喟然嘆曰飛梁插漢羽旆排霄遠岫朝宗近岑羅立寰中鼎湖淮南兼茲而三洵偃靜之

精廬煉石之密室竚可揚軒蓋於九垓走輪蹄於
萬里者矣遂入謁主人曰許君雅志修煉急需者
善地耳貴地山水合度雅稱仙窟今不避唐突輒
以相瀆價值低昂惟所命之不敢恡也公曰許君
仙風奕奕迥出風塵吉地自歸吉人小人涼德何
足堪此惟當避舍以俟儼臨耳二君疆之受值不
可詰朝徙居西林而卒老焉今稱西林地主顯忠
真官是也宋真宗時遣中使致禱於真君則有朱
衣一人遠迓道左至館索之無有也及周行廊廡

過地主堂指金公像曰此卽日昨所見者也嘆息
良久歸具以奏寧宗嘉定間封靈助侯

胡詹二士旌陽縣之二吏也真君致政歸山二士
思慕盛德遠來相依服役惟謹真君憫其誠意而
知其分不應仙乃於福地東南兩峯並峙之巔俾
歿後立祠其間永享血食今稱胡詹嶺是也

許大真君之家隸也真君奉詔上昇預遣其夫婦
運米出市

今西嶺市

及聞真君拔宅仙舉覆車奔

歸則仙仗已發夫婦哀號乞從真君授以地仙之

長卿集卷三十四
術俱隱西山其覆車之米在地復生

今地名翻車

崗生米市

易姓曰午復易曰干夫婦並能爲詩干

詩曰自從明府昇天後出入塵寰直至今不是藏
名混世俗賣柴沽酒白雲心妻詩曰醉舞狂歌踏
落花綠羅裙帶有丹砂往來城市賣生藥砥箇西
山是我家 出入仙鄉不記春豈知塵世有寒溫
兒家只在山西裏除却白雲誰到門今人時有見
之者

李鼎曰望紫氣而識真人金公之鑒裁卓矣捨

宅爲觀方之賀監此爲先登所謂旣以與人已
愈有者乎胡詹刀筆之英棲托高秀雖不得仙
亦足以豪矣白石先生之言曰天上多至尊奉
事尤苦於人間但期久生莫老歿耳許大聞此
復何憾哉

淨明經法監度師三真人傳

洪崖先生莫詳其始與赤松子俱爲神農師真誥
曰吞琅玕之草而方營丘墓者洪崖先生是也

今

爲青城仙伯郭景純遊仙詩曰左挹浮丘臂右拍

洪崖肩指此 隋時出現於晉陽之姑射山又現於

豫章之西山讀書釣魚於城西河之石磯今釣魚

臺是也

隋文帝開皇九年易豫章為洪州則以先

生之故耳先生名氲又名蘊字藏真身長七尺五

寸眉目竦秀語音如鍾善琴書喜長嘯嘗遇日月

二君授以淨明靈寶忠孝之道時戴烏帽或特角

巾或櫛榛巾被鹿裘或衣紅焦葛衫烏犀帶短鞞

靴每行則乘一白騾曰雪精從五童子名狀並恠

曰橋栗木葛掘負六角扇垂雲笠又曰白藤笠方

木鐙二玄書木如意筇竹杖長生瓢魏惠壺不注

杓又曰長盈壺長滿杯自然流酌出入城郭朝來

暮去人莫測其蹤唐武后聖曆中召不赴玄宗開

元中復召見於湛露殿上從容問曰聞先生善長

嘯可得聞乎於是應聲而發音韻清絕上曰朕何

如堯舜先生何似許由先生對曰陛下道超堯舜

臣德謝許由昔堯召許由而不至今陛下召臣而

臣來上嘉之拜太常卿累至司徒皆不受一日奏

曰陛下何惜一山一水不令臣追蹤巢由乃詔還

山遂絕粒服氣時時出沒往來於西山姑射二山
多遊終南太華赤城王屋山中與東羅二太師爲
侶每述金丹華池之事易形鍊化之術人莫究其
微妙焉又每日乘白騾領僕從遊西山渡章江入
洪城人未有見其返者一日章江舟人心切疑之
遂戒其子躡踪觀其所以乃賣藥周遊市中卒之
晉尚書潛惠彭真人故宅宗華福地今彭真觀與
其學仙之徒焚香掃石談玄閱秘圍棋握槊諷詠
逾時已而乘白騾與僕從俱入彭仙舊鍊丹井中

而去舟人子復躡其後道塗坦然行未久忽聞櫓
聲舟人子曰此我舟中櫓聲也先生問之乃實告
其故復問曰汝願偕往否曰不願於是令之瞑目
手摩其頂舟人子已在舟中矣自是不復入城如
此者九十三年後隱去不知所終今西山有洪崖
井與烏晶源爲鄰深不可測四時飛流奔瀉若雷
殷地中對語莫能聞聲三伏炎蒸寒氣襲人毛髮
森豎古傳與彭仙丹井通焉井畔多楓樹先生丹
成跨雪精從楓樹上升雲鄉樹上傳有雪精遺迹

長卿集卷二十四
井西有紫清宮舊爲應聖宮卽先生栖真所也嘗
注老子周易三禮穀梁傳行於世參學淨明者尊
爲經師君

胡真人名惠超字拔俗不知何許人也唐高宗上
元間來自廬山棲於豫章西山之洪井永淳中幅
巾布褐負杖至游帷觀見同輩手不舉作禮擎拳
而已美鬚眉體貌瓌偉平居無異常人雜處稠人
中則獨出其上故時稱胡長仙云或問其年則曰
五十二歲逾數十載問之亦復云然至論晉宋已

來治亂興廢如所目擊喜談晉司空張觀文博物
如其友或曰許吳二君嘗授其延生鍊化超三元
九紀之道能檄召神靈驅奮雷雨至陶弘景校茅
山華陽洞太清經七十卷真人亦預焉背縫盡朱
書其姓名覽皆見之又曰吾昔到此客於盱母用
是不知其爲何代人也每路逢暴骨遺骸悉埋之
地有古物寶器掘之如其言而獲聞邪恠之物疾
之如讐卽務剪除之時豫章西門有樟木精爲獨
足神大興恠崇邀人淫祀真人一見叱罵書符禁

制即命斬伐積薪灌油以火禁燎妖祟遂滅以地
為觀舊名信果今額天慶即玄妙昔游帷觀唐初

嘗荒廢因問主觀胡不修葺荅以乏材力真人奮
然而往不逾月以木棧至高安樟木江口距觀九
十里命棧人緊繫縛各就宿江岸臨暮飛墨符一
道中夜烈風雷雨比明棧已在壇下矣陵林嶺谷
所當之路林木披靡摧折又於山下發一窖出錢
三百千為工役之須應殿宇非人所居者皆役鬼
神為之門外鑿三井以辟火灾俗名禁火井故至

今永無火灾也

久之異迹顯著天后以蒲輪召之

真人深隱巖谷州縣搜求之急不得已而出至都
引見武城殿后臨問仙事真人正陳道德帝王治
化之源后大喜又欲留於都下委以煉丹之事真
人辭請還山修鍊勅遣使齎金帛送歸行次單父
賜書曰先生道位高尚早出塵俗如軒曆之廣成
漢朝之河上遂能不遠千里來赴三川日御先開
望霓裳之漸遠天津後渡瞻鶴蓋以方騰遙睇風
雲惆悵無已倘蒙九轉之餘希遺一丸之藥真人

乃於洪崖先生古壇祭煉丹首尾三年降詔趣召
詣闕至則館于禁中真人辭歸固留不許真人一
朝遁去上聞歎恨久之遣使齎贈甚厚兼贈詩一
篇曰高人協高志山服住山家迢迢聞風月去去
隔煙霞碧岫歸玄洞玉竈鍊丹砂今日星津上延
首望靈槎真人歸西山居于盱母靖觀有三清中
門祖師橫堂皆鬼工所造平柱眠枋疊至脊斲削
之工人弗可侔至植立不斜堅固不朽非人可及
樑牌親題大周年號筆力遒勁又自寫其真于後

殿之壁其居西山人皆師事之千里之內無疫癘
水旱之灾無狂鷲天折之苦遠近賴焉長安三年
二月十六日命弟子於游帷觀之西北伏龍崗造
墳藏太玄真符二七星神劍靈寶策杖各一三日
而訖真人正衣冠坐繩床異香滿室空中雲鶴墻
外人馬之聲紛紛不絕視之已解蛻矣州具以聞
賜錢帛修齋醮謚曰洞真先生姑蘇司馬禎撰碑
具載詳悉世遠真壁將頽有一雲水道士至以板
木模寫之儼然復前狀越夕而壁倒道士亦不知

長鴻集卷三十四 淨明下
所往門以政和六年奉旨重造始撤去今其真版存焉

先生姓郭名璞字景純河東人也好經術博學有奇才而訥於言論善詞賦爲東晉之冠好古文奇字妙於陰陽術數有郭公者客河東精於卜筮先生往師之公以青囊書九卷授之由是洞達五行天文地理卜筮之術爲人禳災轉禍妙用無方惠懷之際先生知中原將亂乃避地東南抵將軍趙固會固所乘良馬歿固惜之不接賓客先生曰吾

能活馬吏入白固出求教先生令健夫二三十輩皆持長竿東行三十里有丘林社廟便以竿拍之當得一物急持以歸得此活馬也固如其言果得一物如猴持以歸此物見歿馬卽噓吸其鼻頃之馬起如常物忽不見元帝渡江後王導辟爲參軍先生事母至孝母歿自卜墓地於暨陽去水纔百步人以近水爲言先生曰卽爲陸矣未幾砂漲去墓數十里皆爲桑田明帝大明二年甲申王敦舉兵反次于湖先生往見之敦曰吾夢一木破天此

何祥也先生曰一木破天乃未字也明公舉事必敗無成因極言忠孝之大義敦怒曰吾壽幾何先生曰若恪守臣節壽未可量若改之不速禍將不久敦曰君壽幾何先生曰吾命盡今日日中敦愈怒斬之卽有見先生於丹陽市者世以爲兵解云所著詩賦誄頌數萬言洞林經六十卷新林十卷卜韻一篇註爾雅三蒼方言穆天子傳山海經皆傳于世凡參學淨明弟子皆尊曰監度師君

淨明揚教劉先生傳

劉玉字順真號玉真子高祖宗翰自鄱陽石門遷南康建昌各所居里亦曰石門宋紹興中擢第授來安簿父劓母鄔氏以寶祐丁巳八月二十日生先生是旦紅霞覆屋鄰曲駭異父再遷新建忠孝鄉先生夙有卓識五歲就學讀書務通大義弱冠父母繼亾居喪盡禮家貧力耕而食篤志於神仙之學初許真君昇仙時留識曰吾仙去後一千二百四十年間五陵之內當出弟子八百人師出豫章河西岸大揚吾教郡江心忽生沙州掩過沙井

口者是其時也至建炎戊申僅七百年兵禍煽結
民物塗炭何真公等致禱真君句垂救度旣而降
神渝川諭以辛亥八月之望當降玉隆宮至期迎
候日中雲霧鬱勃自天而下由殿西徑升玉冊殿
降授飛僊度人經淨明忠孝大法真公得之建翼
真壇傳度弟子五百餘人消穰厄會民賴以安迨
後二百餘年其法寢微至元壬辰朝命改隆興路
爲隆興行省其年五月章江門外生一洲是秋先
生經行西山瀉油崗遇胡洞真天師告以姓字且

曰龍沙已生淨明大教將興當出八百弟子汝爲
之師歲在丙申臘月庚申真君下降子家子際遇
如何真公時言訖不見先生心竊自喜明年春復
於玉隆禁山遇之卽下拜胡君曰予今再來實傳
真君之旨可尋西山中黃堂山烏晶源建玉真壇
以栖隱當知真君卽大陽帝君化生仙傳謂生時
有金鳳啣珠之兆乃日中金烏流精在天爲氣在
地成形鴻濛開闢降于洪井却至海藏至真君降
世乃由扶桑之墟下貫崑崙之頂從風輪水淵由

地中騰出洪井以應西山之氣故其地名曰烏晶
原蓋日月二君屬記真君以爲後代傳道之信其
所在之處萬靈護持出沒變化非容人力真君降
於吳赤烏己未歲正月二十八日戊午己未爲火
在天上初元戊午表大陽也二年己未表餘氣化
生也正月表人道始於寅也二十八日表近晦而
續明也天啟仙運年符赤烏其後海昏誅蛇有赤
烏飛過亦應此耳今仙運將周烏晶出現其在青
羊之歲上元之辰紫清宮中子得以鎮靖廬大教

興矣因與言淨明之旨踰時而別及出山已越二
日先生自是益加精進又於孝行里立騰勝道院
以善道勸化遠近聞知嚮慕從游者衆甲午十一
月甲子遇水府仙伯郭君教以相地之術遂游黃
堂山烏晶原果得魏道人故居爲真君昔時修真
之所而又洪崖先生舊隱地也地隸紫清以田易
之而卜築定居焉元貞乙未正月甲寅先生神遊
玉真府遇真君與張君胡君玉真朝元回先生作
禮真君顧令先生求見陽烏張君袖出三足烏示

之上元庚申先生往紫清與弟子王真定方公成
登拍洪樓焚香默禱聞硫氣郁烈倚欄候望倏有
流光飛墜鑪間細視則烏晶在焉大如椰子非鐵
非石黑潤堅沈受而藏之是夕胡君授以大道約
明年歲晚復至至十二月庚申王真定方公成胡
次由輩同集先生之舍先生曰有一士夙緣深重
當不召而至是夕雪大作漏初下玉隆宮法子黃
元吉忽至先生曰天寒歲晚遠來何爲元吉曰夜
來夢胡真人告曰劉玉真家有盛事汝可速往故

來先生於是與諸弟子明燎蕪薰至誠以俟夜將
半胡師倏至亟率諸弟子下階迎拜黃氣瀾漫非
烟非霧擁升堂上降授許真君所撰玉真靈寶壇
記記曰鍾陵之靈鍾大寶於西山厥維西山萃古
今精氣實上下神仙一大區宅有道之士率由是
出自吾得太上淨明吾與張洪崖胡拔俗等其人
也龍沙有識松沙有記一皆爲是西山中靈寶秘
法前鸞翔後鶴峙奠烏精紹仙喬斯靈伊何太素
始名大極判精靈寶現形故此一寶靈也在天爲

黃中在地爲烏晶在人爲丹肩惟寶斯靈弗寶弗靈有道之士克寶斯靈者自有重重樓閣內景黃庭三五飛步神奏玉京符千年之嘉運備八百之仙數騎鶴玉府烹鳳瑤池其視塵世寶珠直天地間一瓦礫耳吾有弟子玉真子受吾記囑來尋舊跡克寶斯靈克靈厥晶八百羣真一曰玉真二曰隱真三曰洞真靈真寶真一真萬真真真聚神金烏誕靈靈寶聚精玉兔誕形天降斯道地升斯寶珍之作之天地爲一率是羣真克紹吾勲有道之

士無累俗紛式克輔之斬蛇馘鯨窮亘宇宙功超玉清顧不偉歟乃繫之以銘曰金烏流晶洪井肖形鍾陵聚靈龍沙首英八百八百靈寶斯獲玉真隱德爰立厥宅紙尾署曰弟子劉玉真丁酉正月甲子朔旦登山巔授至道頃之光景豁然既而郭君授以壇疏序曰天靈地寶成大道藏玉真其生也無名其出也有數今就黃堂山立壇奉道祝國壽報親恩如是道在其中矣師仙君立記銘予具疏而成之疏曰龍沙識仙八百始自玉真烏晶麗

景三千中藏靈寶將周氣運用立壇場演教白水
真人大家從吏便看黃山處士特地功成籍桂名
香卽日均書玉府蟠桃性熟他時共宴瓊宮至除
夕寒甚雪深先生清齋以待夜過半介胄神人排
闥前曰真君召子乃篝燈躋攀而上仰觀天星朗
然少焉仙駕降臨先生俯伏瞻禮採栢葉藉棗橘
以進真君告曰茲山前俯鸞崗後據鶴嶺吾昔修
真時於此朝禮太上太上命日月二君降此授吾
至道是名靈寶朝天壇吾今授此中黃大道八柱

真詮子當敬受吾八百弟子汝爲首英名氏悉在
華林八百洞天久矣刻書青琅高揭丹崖弟子不
昧心君不戕性命忠孝存心方便濟物異日功成
果滿胥會洞中鍊消陰滓登昇白日顧不樂與言
畢高舉先生拜送瞻望極目而還十月甲午寓玉
隆清逸堂丙申胡君復來授以道法及三五飛步
正一斬邪之旨由是開闡大教誘誨後學其法以
忠孝爲本敬天崇道濟生渡死爲事簡而不繁諸
弟子問曰昔何真公所傳稍繁今先生所授極簡

何也先生曰昔紹興之時仙期懸隔以法宏教故
繁今龍沙已生仙期迫近以道宏教故約曰今靖
廬粗備當首致華封之祝次伸追遠之誠擇日懇
祈胡師請降日精月華超度先亾以除冥累乃於
十月之望登壇敷奏席地存神置二陶器於壇上
俄金光二道飛注器中左液如丹右津如汞用以
書符訖事無餘越七日弟子咸夢先亾言感真君
拯拔陶鑄返陰生陽已昇仙階矣明年十月庚申
郭君復至授以法說而鄧君數來談易故先生於

易尤邃方公成嘗言爻象夜分風動燭滅先生一
噓而燭復然公成驚問先生徐曰子言紙上之易
而未知身中之易如知之則已滅者可復明又何
惟焉公成下拜稱謝居常與羣僊接對而張胡郭
鄧爲密張君嘗招過洪井擲扇水中命之浮渡又
與如意丹方令采洪井石蒲爲藥以施病者郭君
嘗引遊水府見門下鎖一巨青猴指曰此神禹所
禁巫支祁也先生道行日隆益自韜晦間爲人祈
禱襍解無不奇出隱真洞真靖廬次第興建諸品

秘要相繼授受至大戊申正月丁卯投烏晶於洪井曰緣重者得之卽以傳教之任付弟子黃元吉曰吾此生爲大教初機而來異時再出當與八百弟子俱會今陽數將終身謝之後以吾道體靜夜火之復骨於招賢之原三年將遷瘞海島二月癸巳如紫清宮翠巖寺告別甲午示疾弟子畢集丙申晨興端坐榻上日正中舉手拱揖就榻側臥而逝春秋五十有二弟子遵遺旨送終後三年啟窆視之唯存空函先生不多言言必關於天理世教

於三教之旨了然解悟而以老氏爲宗有玉真語錄淨明秘旨凡一百三十七品云

李鼎曰都僊一千二百四十年之讖適當萬曆在宥之壬子距今一年而溢耳海內奉道弟子延領西望而不得其朕也蓋日怛怛焉余獲玉真先生語錄三卷讀旣卒業卓然而嘆曰攄發淨明忠孝之旨何其博而詳宛而曲當與卽至人再來何得更一字益一語乎因悟師出豫章之語預識先生

先生豫章人

况龍沙倏生適當

其會則其應初機而出也蓋在今日爲初機耳
嗣是五陵之英五陵卽五嶽八百之彥鍾天靈
胤地寶者儼然而至烏知非先生之高足而後
進之領袖乎

淨明嗣教四先生傳

黃元吉字希文豫章豐城人父良後母吳氏年十
二入玉隆萬壽宮事清逸堂朱師朱歿有劉玉真
先生者受許君龍沙之記爲八百仙人之首獨重
希文以爲可托將謝世以其傳囑焉蓋其說以淨

明忠孝爲本希文事劉如父每飯必薦之而後嘗
乃卽其山立玉真隱真洞真三壇以授弟子元英
宗至治三年游京師朝士多禮接之莫不嘆異明
年泰定改元嗣漢三十九代張天師朝京具書請
希文爲淨明崇德弘道法師教門高士玉隆萬壽
宮焚修提點未行玄教大宗師留之崇真萬壽宮
期年將列名上請璽書希文翛然高居唯以發明
其師說爲已事十二月十一日爲書寄別弟子陳
天和等且命從者曰今夜子時吾返玉真之墟矣

明日用火淨吾骨於城東門外薪盡火絕有風南來者吾報汝也已而果然從者負其遺劍將歸藏西山希文在世五十五年爲道士四十三年度弟子陳天和劉真傳熊玄暉劉思復黃通理其餘授淨明忠孝之教者不可備列

徐異一名慧字子奇號丹扃子廬陵人元世祖至元辛卯八月二十七日寅時生幼孤耻與俗子友閉戶讀書危坐竟日養吾劉先生爲須溪冢嫡名重一時子奇嘗侍大父愚谷公往謁之一見問所

學卽命以詩題子奇援筆立就先生大加賞歎因取少陵徐卿二子生絕奇之語易字子奇戊午春爲金臺之遊聞中黃先生得都僊淨明之道駐崇真宮遂徃師焉中黃一見曰夜夢子今子來似有夙契當宏吾教自是盡得中黃八柱之秘賜號淨明配道格神昭效法師由是中朝貴人交剡互辟恬不能介其靈府甲子春以母老竟歸時家適病疫子奇竟詣母氏榻前而病者一時俱起是歲大旱請禱立應自是弟子益衆雖夙儒者年皆委質

北面子竒尚氣節重然諾剖決玄微犁然有當於人心咸稱竒峰先生又稱丹扃道人自贊其像曰生前我卽汝歿後汝卽我於是二中間誰曾識真我咦月輪元不在波心四海五湖無不可至五月望日命弟子蕭尚賢代謝師僊將吏治具召戚友言別明日日中索筆留頌頌訖端坐鼻流玉筋尺餘則已化矣

趙宜真號原陽子父爲安福令因家焉真人幼穎敏博通經史習進士業將赴省試行次通州疾大作夢神人語之曰女吾家人何望世貴詰旦疾愈歸請于父從曾真人受淨明忠孝道法清微諸階雷教間有闕文悉加參考訂正復師張廣濟得長春丘真人北孤之傳師李玄一得紫清白真人南孤之學至於醫術尤所研究嘗遊白鶴山訪晉匡仙遺址結茆居之從者不遠千里雲集座下壬辰兵興挾弟子遊湘蜀歷武當謁龍虎冲虛天師深加禮敬上清學者多師焉還至贛之雩都紫陽觀因居之弟子益衆有原陽法語行于世由是淨明

學者尊爲嗣師云

劉淵然號體玄子其先徐之蕭縣人元英宗至治間祖伯成贛州路總管因家焉真人總管次子元壽之子也祖母謝夫人夢紫衣道人入室而先生矣年十六爲道士得親炙趙公刻志進修寒暑不懈每與同輩處語及修行輒舉忠孝爲本原陽聞之嘆曰此良器也携之歸金精山授以玉清宗教社令烈雷玉宸黃籙玉籙太極淨明等書呼召風雷効治鬼物濟拔幽爽無不響應又三年原陽

告以金火返還大丹之訣棲神鍊氣玄悟超卓嘗遊龍虎山過南昌值歲旱官屬請禱大雨傾注民獲有秋由是聲聞益彰洪武癸酉召至闕下接對清問深契宸衷試以道術靈應赫然乃賜號高道建西山道院於朝天宮以居之後駕幸朝天撫諭甚至遣中使齋手詔諭以名山洞府尋真之遊真人卽入謝得乘驛傳遊廬山上鄂渚至武當宮適鑾御賓天乃召還領右正一之命永樂間陞左正一建金籙大齋七晝夕奏曰靈貺昭荅有

醴泉甘露鸞鶴之祥寵錫駢蕃真人素性耿介不合於人因中以他事謫置龍虎山又謫雲南居龍泉觀三載滇民告旱疾疫大作真人施藥禱雨稿者以甦病者以起洪熙時遣使徵還命居洞陽觀賜貂裘鶴氅親書冲虛至道玄妙無爲光範演教長春真人授之曰以此封卿恐不滿德真人頓首謝力辭不許復賜誥于前封加莊靜普濟四字又賜以銀章俾領天下道教事選樂舞生十人爲之徒輿帳供奉之盛卓冠當時宣德元年召至內廷

用法衣寶劍真人因奏立雲南大理金齒三道紀司上從之於是命其徒爲道紀闡化南詔真人屢乞還朝天以終餘齒七年二月上親灑宸翰作山水圖賜之復題詩其端遣內臣羅智送還真人乃奏留弟子邵以正仍居洞陽以代祝釐遂授以正道錄司右至靈踰月真人至朝天宮見者莫不稱嘆是年秋八月有八日昧爽沐浴更衣集其徒告曰人以氣聚而生氣散而死吾將逝矣日中引手作一圈曰呵呵跌坐而化壽八十有二計聞

上遣行人吳惠諭祭命工部營葬江寧縣安德鄉
圓子崗

恭進淨明忠孝經傳正訛表

伏以道德光昭星日高懸天表文章晦蝕江河廻
障波流有先覺斯開後人因述明益彰作聖罪我
庶幾其知我小巫敢避乎大巫恭遇 淨明道師
九州都仙太史兼高明大使江西福主許真君德
備中和功參宇宙澄潭萬頃性源妙淨如如寶月
一輪心鏡元明炯炯純忠翼翼務先昭事乎天君

至孝夔夔矢念不虧乎大體神丹濟世溥大利而
不廢道劍安民耀神武而不殺筠河浮法水瘟疫
妖札之害頓消鐵柱壯雄威魍魎之氛永絕
殫精於左史右史之業上行五千之文屬意於見
知聞知之人下開八百之統况乎師師有道仰經
師法師度師之在天日牖頌蒙而猛肖故茲真真
印心覩玉真隱真洞真之立靖竚看上挺之速成
伏念鼎世業爲儒稍涉六籍百家之涖弱齡慕道
未窺三洞四輔之藩仗劍懷書爰失塞翁之馬尋

師訪侶終亾岐路之羊詎知天翼其行舉趾動縈
荆棘或者神授之鑑回心獲證菩提歸去來兮淵
明之松菊滿徑忻然樂矣黔婁之著作盈篇居傍
至人之居在笏睇鸞岡鶴嶺運際中天之運登臺
眺蛟井龍沙乘雲控霞者駢臻冀獲驂其後乘吸
風飲露者麈至將無挹彼清芬敬展琅函靜研玉
冊顧龍章鳳篆本非肉人敢知而豕亥魯魚亦多
流俗傳會用是不辭僭竊正其謬訛爲經者始中
黃而終八柱敢曰披沙簡金爲傳者首 都仙而

竟四真或免亂朱間紫望瓊臺而遙擲分則焉能
就金闥以瞻依情其曷已伏願憫其志且矜其愚
夜飛青鳥牖其衷兼赦其妄蚤放金鷄蓋錄後進
以如林請自隗始緝前言而合瑞無作神羞鼎無
任惶懼戰慄之至

長雅集卷之二十四

詩

廣四真如象攝米間紫室

山



書